

Was Frau über Männer denkt

Männer ond Frau tickat oifach komplett andersch. Dia meischte Frau nemmat sich vor, ihre Männer zom ändra. Ond wenn sen g'ändret hend, no gfällt er ihne nemme. Dann hend se bloß no oi Gemeinsamkeit: da gleiche Hochzeitstag!

Mir Männer send jo überhaupt net berechnend, was mr von Frau net grad behaupta kann. Han i doch neulich ma Gespräch von meiner Nochbre ond ihrer Freindin auf dera ihr'm Balko' von meira Terrass' aus verfolgt ken-
na.

Sait dui doch, dass die beschte Art ihren Ma drzua zom bringa, dass 'r ebbes duat, was 'r net gern macht, sei, durchblicka zu lassa, dass er z' alt drfier wär!

No hend se weiter g'läschtrat: „Männer hend jo bloß deshalb koin Busa, weil se dera Doppelbelaschtung net gwachsa wärat.“ Drbei fend i, dass die Kurve die lieblichste Entfernung zwischa zwoi Punkt isch!

No hot dui Freindin gsait, sie sei a wunderbare Haushälterin. Emmer wenn Sie en Ma verlässt, behält sie 's Haus.



I glaub net wirklich, dass Männer ond Frau natürliche Feind send – höggshdens ihre Rechtsawält. Frau ondranander send viel difizieler. Wenn Frau sich umarmat, no isch des o'gfähr so ehrlich gmoint, wie die Begrüßung von zwoi Boxer em Ring.

Hinter jedem erfolgreich Ma stoht a erfolgreiche Frau. Ond hentr jeder erfolgreiche Frau stoht ... en Korb Wäsch!

Kennat Sie sich a Welt ohne Männer vorstella? Koin Fußball ond jede Menge dicke, Glückliche Frau! Aber die meischte mollige Frau send net z' dick. Die send bloß z' klei für ihr Gwicht.

Bis näggshd Woch'.
Ihr

Wulf Wager